



**Sud Bosne i Hercegovine**  
**Суд Босне и Херцеговине**

---

Broj: S1 3 IŽ 048856 24 IŽ  
Sarajevo, 13.08.2024.godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Mirsade Džindo, kao predsjednika vijeća, Zvezdane Antonović i Redžiba Begića, kao članova vijeća, odlučujući o žalbi političke stranke Narodni front-Jelena Trivić, sa sjedištem u Banja Luci, ul. Marije Bursać 1. koju zastupa predsjednik stranke Dr Jelena Trivić, izjavljenoj protiv Odluke Centralne izborne komisije Bosne i Hercegovine broj: 05-1-07-5-830/24 od 05.08.2024. godine, o utvrđivanju odgovornosti za vođenje preuranjene izborne kampanje, u nejavnoj sjednici, održanoj dana 13.08.2024. godine, donio je

**R J E Š E N J E**

**Žalba se odbija.**

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu, i to stavom 1. utvrđeno je da je politička stranka Narodni front-Jelena Trivić odgovorna što je Željko Koprivica pristalica ove političke stranke, putem društvene mreže Facebook vršio preuranjenu kampanju prije zvaničnog početka izborne kampanje, čime je prekršila pravila ponašanja u izbornom periodu iz članka 7.1 Izbornog zakona BiH, pa joj je na osnovu člana 6.7 stav 2. tačka 1) Izbornog zakona BiH i primjenom člana 19.9 stav 1. tačka 3) i stav 2. Izbornog zakona BiH izrečena novčana kazna u iznosu od 3.500,00 KM (tri hiljade i petsto konvertibilnih maraka). Stavom 2. je određeno da će se novčana kazna uplatiti u roku od 8 dana na račun Ministarstva finansija i trezora BiH, dok je stavom 3. naloženo Željku Koprivici da sa društvene mreže Facebook ukloni spornu objavu za koju je Centralna izborna komisija BiH izrekla novčanu kaznu, i da politička stranka Narodni front-Jelena Trivić sve pristalice i kandidate ove političke stranke za predstojeće Lokalne izbore 2024. godine, obavijesti da su dužni da se suzdrže od javnog oglašavanja i vođenja izborne kampanje u elektronskim, onlajn i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Protiv navedene odluke Centralne izborne komisije (u daljem tekstu CIK BiH)

žalbu je blagovreno izjavila politička stranka Narodni front-Jelena Trivić u kojoj navodi da negira navode iz Odluke da je Koprivica Željko sa svojim objavama na društvenoj mreži Facebook prekršio odredbe člana 7.1 Izbornog zakona BiH jer navedeno ne predstavlja program političke organizacije Narodni front-Jelena Trivić, kao ni Opštinskog odbora Narodni front Vlasenica, bez obzira na činjenicu što je navedeno lice pristalica ove političke stranke. Žalitelj ističe da smatra da je kazna nesrazmjerna i pretjerano oštra jer većina političkih funkcionera i kandidata nije upoznata sa novim odredbama Izbornog zakona koji se odnosi na „preuranjenu kampanju“.

U odgovoru na žalbu Centralna izborna komisija Bosne i Hercegovine je predložila da se žalba odbije kao neosnovana.

Žalba nije osnovana.

Iz stanja spisa proizlazi da je CIK BiH dana 07.07.2024. godine putem e-maila od strane političke stranke Savez nezavisnih socijaldemokrata-SNSD-Milorad Dodik, OO SNSD Vlasenica zaprimila prigovor sa dokazima (fotografije i snimak ekrana sa Facebook stranice), a koja se odnosi na kršenje odredbe člana 7.1 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), u kojem je navedeno da je Željko Koprivica, član Narodnog fronta Vlasenica i kandidat za odbornika na predstojećim izborima ispred ove partije, u svojoj objavi iz juna objavio da je pristupio Narodnom frontu Vlasenica i da će oi aktivnostima obavještavati svakodnevno. Dalje je istaknuto da navedeno lice vodi negativnu kampanju protiv načelnika iznoseći uvrede na njegov račun, kao i da će ubrzo doći novo vrijeme aludirajući da će on biti vlast, odnosno da je isti navodio ciljeve za koje se bori opozicija-odnosno da je vodio preuranjenu kampanju.

CIK BiH je predmetni prigovor ocijenila kao inicijativu za pokretanje i vođenje postupka po službenoj dužnosti u smislu odredbe člana 6.2 stav 2. Izbornog zakona BiH, te je isti dostavila žalitelju, kao i Željku Koprivici na izjašnjenje, koji su u svojim izjašnjenjima osporavali navode iz prigovora da je došlo do preuranjene izborne kampanje.

„Preuranjena kampanja“, u smislu odredbe člana 1.1a tačka 8. Izbornog zakona Bosne i Hercegovine, je svaki oblik radnji iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje.

Odredbom člana 7.1 Izbornog zakona BiH je propisano da u periodu preuranjene izborne kampanje zabranjeno je vođenje izborne kampanje u elektronskim, onlajn i štampanim medijima i putem društvenih mreža ili bilo koji oblik javnog oglašavanja kampanje. Ova zabrana ne odnosi se na organiziranje zakonitih zvaničnih skupova organa i događaja političkih subjekata u svrhe koje nisu kampanja.

Nadalje, odredbom člana 9. stav 1. Pravilnika o medijskom predstavljanju i

javnom oglašavanju političkih subjekata u izbornom periodu („Službeni glasnik BiH", broj 31/24) propisano je da u periodu preuranjene kampanje političkim subjektima je zabranjen svaki oblik radnje iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje. Stavom 2. istog člana propisano je da se zabrana iz stava 1. ovog člana, odnosi na upoznavanje birača i javnosti sa programom i kandidatima političkih subjekata za predstojeće izbore.

Nakon uvida u kompletan spis i dostavljene dokaze-screenshotove objava sa društvene mreže Facebook, te cijeneći izjašnjenje političke stranke i Željka Koprivice, pravilno je prema shvatanju apelacionog vijeća CIK BiH utvrdila da je politička stranka Narodni front-Jelena Trivić odgovorna za kršenje člana 7.1 Izbornog zakona Bosne i Hercegovine. Naime, iz samog teksta sporne objave na Facebook gdje Željko Koprivica komentariše aktuelnog načelnika Opštine u negativnom kontekstu i kritički se osvrće na njegov angažman u lokalnoj zajednici navodeći: „Doći će i to normalno vrijeme, kad tad, a lično sam uvjeren da dolazi ubrzo...Sve je do naroda, sve je u narodnim rukama i volji naroda. Kako narod bude želio, tako će i biti!!!“, odnosno u drugoj objavi: „ Mi se usuđujem reći, cjelokupna opozicija borimo za slobodu svih građana, slobodu misli, druženja, znanja i stručnosti, protiv smo progona bilo koje vrste“, odnosno u trećoj objavi: „Poštovani građani Vlasenice, Pred Vama su Preduslovi za rehabilitaciju Vlasenice. Preduslovi koji će biti okosnica Platforme političkog djelovanja Narodnog fronta-Jelena Trivić Vlasenica na lokalnom nivou. Naravno da ovo nije konačna lista Preduslova jer u periodu koji je pred nama biće ih još. U konačnoj verziji Platforme svi će biti obrađeni sa pravnog, ekonomskog i drugih aspekata pripadajuće struke. Narodni front će uvijek biti uz svoj narod i svoje građane“, jasno proizlazi da je Željko Koprivica vodio izbornu kampanju prije službenog početka izborne kampanje i da objava u svom opisu i sadržaju pokazuje promociju programa političke stranke kojoj imenovani pripada, a sve sa ciljem informisanja birača u vezi sa programom i ciljevima ove političke opcije u kontekstu Lokalnih izbora 2024. godine.

Sporni sadržaj je objavio Željko Koprivica, a isti je u članstvu političke stranke Narodni front-Jelena Trivić i samim time je i pristalica te stranke i isti objavom ukazuje na viziju političke stranke kojoj pripada jer u tekstu spominje navedeni politički subjekt. Da se radi o pristalici ove političke stranke govori objava od 11.06.2024. godine u kojoj ističe da je pristupio članstvu političke stranke Narodni front-Jelena Trivić, a koju objavu prati slika predsjednice ove stranke, kao i samo izjašnjenje Željka Koprivice od 30.07.2024. godine.

Odluka o visini novčane kazne je pravilna i zakonita jer je izrečena zbog kršenja odredbe člana 7.1 Izbornog zakona BiH u propisanom zakonskom minimumu od 3.500,00 KM (raspon propisane kazne od 3.000,00 do 30.000,00 KM), a istom će se postići svrha kažnjavanja.

Pravilno je CIK BiH žalitelju u skladu sa članom 6.5 Izbornog zakona BiH u cilju daljeg sprječavanja kršenja odredbe Izbornog zakona BiH kojim se zabranjuje

vođenje izborne kampanje i javnog oglašavanja u periodu preuranjene kampanje. izrekla i privremenu mjeru Željku Koprivici da sa društvene mreže Facebook ukloni spornu objavu za koju je Centralna izborna komisija BiH izrekla novčanu kaznu, i da politička stranka Narodni front-Jelena Trivić sve pristalice i kandidate ove političke stranke za predstojeće Lokalne izbore 2024. godine, obavijesti da su dužni da se suzdrže od javnog oglašavanja i vođenja izborne kampanje u elektronskim, onlajn i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Iz svih izloženih razloga ovo vijeće je osporenu odluku, ocijenilo u potpunosti pravilnom i zakonitom, slijedom čega je žalbu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

PREDSJEDNIK VIJEĆA  
SUDIJA  
Mirsada Džindo